

由庚堂集

由庚堂集卷之二十六

縉雲鄭汝璧邦章甫著

奏疏

專官足餉畱軍疏

題臣惟脩守之要重在得人兵食之謀貴  
于調劑東省沿海延袤二千餘里防海  
諸務雖有該道專管而分理實資之府  
官事體煩重若非專官經理不便責成

而主客兵餉歲費不貲亦宜預爲區處  
至于環海寥廓險要星羅主兵不多止  
藉客兵新募之卒防禦難周均應酌處  
相應列款具

題伏乞

勅下該部再加覆議上

請施行謹題請

旨

一設專官以便責成臣行布按都司議稱  
青萊登三府逼近海洋一切禦倭事宜  
如修築城堡墩臺打造軍火器械及查  
理軍伍支放糧餉等項無專官董理多  
致耽廢在各省直設有海防同知管理  
東土似宜倣而行之但添官必須增費  
又屬未便查得三府清軍同知事務頗  
簡合行改爲海防兼攝清軍鹽捕事務

仍給關防行令專心料理等因到臣該

臣看得青萊登防海事務如城堡之繕  
修軍伍之查補兵餉之收支諸務填委  
至爲煩重緣佐理府官向無專職上司  
文移隨便批發而動致參差下官承委  
任意奉行而每多遲滯甚有一事方委  
而他事復臨一官方查而別官又理人  
無專責勢多耽悞以呼吸之軍情重大

之邊務疎整若此殊爲未便若照省直  
事例另設一官又恐滋費查得三府同  
知事務頗簡堪以專攝合無改爲海防  
同知兼管清軍鹽捕事務各給關防以  
便行事其有克舉職業有裨海防者特  
加獎薦不次超擢如經理無法怠玩廢  
職者查叅究治庶官不必添設而事權  
旣專責成亦便矣伏乞

聖裁

一議兵餉以足軍食臣行布按都司議稱  
本省自倭警以來兵餉日益月增節該  
兩院題畱事例賊罰班價香稅民屯及  
搜括司庫絕軍名糧等銀并萬曆二十  
一年呈允加派本省地丁內總計銀二  
十八萬二千二百三十二兩有奇節次  
支給防海官兵行月糧銀及打造軍火

器械等項外今止剩銀九千一百餘兩  
在庫其二十二年議加丁地餉銀比因  
災荒小民無力辦納不前今查本省新  
加防倭兵馬除在各道支餉外查得標  
下新增選鋒奇兵并各官廩糧及調到  
南兵計一年該餉銀一十四萬四千餘  
兩今見在司庫銀止九千餘兩不足官  
兵一月之餉亟宜預處但兵有主客餉



宜分別若非酌爲定畫那東補西終非  
長計查得標下鋒奇官兵共三千八百  
五十餘員名歲該餉銀七萬八千餘兩  
俱係主兵當于本省地丁內均派其調  
到南兵三千五百餘員名歲該餉銀六  
萬三千五百餘兩事寧應議撤還俱係  
客兵災荒之後民力窮蹙難以併派宜  
畱解部錢糧處給查得兩院贓罰事例

香稅等銀原議事寧解部乞將前項贖并戶部事例及吏承班價香稅等銀俱仍畱充客兵糧餉俟倭患寧息南兵撤還之日照舊解部等因到臣該臣看得有兵有餉日不可缺然非取之民間卽資之庾帑軫民瘼者每欲盡借之公念

國計者又將竭澤于下但方今

內府匱詘臣所心知而山東災重民困尤  
臣所目擊日夕籌度勢在兩難臣查議  
兵有主客餉有久近主兵係土著久戍  
常川操練之卒其餉宜盡派之民間縱  
有豐凶民何敢以爲厲客兵係一時調  
遣之卒事寧卽行遣歸若復重派民間  
創痍疲困之日又何以堪先荷

聖慈軫念東省民艱准將贓罰事例等銀畱

充兵餉今日民艱更甚似應照舊暫留  
臣近奉部議各處增過兵馬糧料或量  
奏留或徑酌派故于二者之中調停酌處  
合無將標下主兵餉銀七萬八千餘兩  
均派本省丁地出辦其調到南兵三千  
五百餘員名歲該餉銀六萬三千五百  
餘兩暫將贓罰事例香稅班價等銀原  
議事寧解部者

俯准仍前暫畱以充客兵糧餉如有不足將  
民屯銀查追湊支俟倭警寧息南兵撤  
放前銀照舊解部事完將用過銀兩造  
冊

奏銷臣酌量事勢萬萬必如此處非敢故  
爲循舊冒

請以干

天聽者也伏乞

聖裁

一畱班軍以固防圉臣行布按都司議稱沿海衛所班軍原爲備倭而設後調赴京邊兩操地方十分空虛近因倭警戒嚴該兩院題

允除春班右營邊軍三千部文原議事寧之日赴邊應照舊畱用外查得秋班京操軍人五千餘名兵部議于萬曆二十三

年照舊京操除遵行外但各軍節荷兩  
院題畱行令登州備倭副總兵楊文于  
內揀選壯軍一千名隨營操練近復嚴  
加督課各軍頗稱精銳可用今若赴班  
就役不無隳棄前功合無將練成壯軍  
一千名准畱登州防海與春班右營三  
千名照舊訓練沿海防守其餘京軍四  
千餘名赴京操備左營三千名赴邊修

防等因到臣該臣看得沿海衛所空虛  
主兵人數甚少倭警戒嚴一時人心惶  
惕節該前撫臣孫鑛等及臣題議荷蒙  
允畱班軍以資防禦今照明春防汛之期各  
軍復應赴操沿海戍守未免仍前空虛  
僉欲盡數乞畱但奉有

欽依臣不敢另議而中應調劑臣又不得不  
爲控



陳除春班右營三千原議防海事寧赴邊外  
所據秋班京操軍士先經臣督令備倭  
副總兵楊文棟練壯軍一千名束以南  
將部伍習以南兵技藝本官用心訓練  
今皆頓革舊習養成銳氣咸已可用不  
下南兵此萬目所共睹者若令赴班就  
役墮已成之功沮方張之氣殊爲可惜  
方今倭情叵測登州備倭衙門壯軍不

滿千餘一旦有警何以備禦且畱止千人不及十分之一似于京操無妨司道僉議乞畱委非得已合無將前練成秋班壯軍一千名與春班右營邊軍三千俱畱山東防海待事寧之日再議其餘秋班京軍四千餘名并春班左營三千名各依期赴京赴邊修防夫兵厘千人而臣再三控畱似爲贅

瀆但前軍轉弱爲強將領多費苦心而北兵  
不下南兵軍伍已爲生色故臣欲畱此  
以倡勇敢而爲漸撤客兵之計也伏乞  
聖裁

更調州縣正官疏

題臣惟元元之命懸於守令衡人任地貴  
兩相宜人與地宜則民安而官亦安壹  
不相宜則非惟有誤其地抑且有累其

人故不特才庸守劣亂政亟行者之應  
急處也卽或守無大戾而才力不足以  
張弛政未拂民而資望有難於彈壓亦  
有不容不爲議置者臣督察各屬有司  
除不職官員應備考察論列者屆期糾  
舉外其有壹貳正官才地不相宜者欲  
掛彈章則無顯過欲仍舊任則誤地方  
謹酌量更置據實爲

皇上陳之萊州之屬膠州爲最劇南臨大海  
西接淮揚帆檣鱗集一有倭警首當其  
衝而風俗刁悍豪右僭踰吏弊叢生姦  
宄蝟集蓋海濱至難治之區也見任知  
州羅啓先性雖豈弟而明不足以燭姦  
心本真誠而才未能以集事吏蠹莫剔  
左右恣舞文之姦田賦靡均阡陌多漏  
徵之稅百務漸隳於姑息振刷安望于

將來似此邊海要區卽精明果毅者處  
之尚費料理而可以選悞不振之才當  
之乎若本官者所當量調簡僻以示曲  
全者也登州之屬惟萊陽爲最鉅疆域  
延袤動數百里賦稅當一郡之半野多  
曠土俗尚澆漓豪家以逋賦爲常事未  
易催科里胥以作奸爲故智苦難搜剔  
向來多以甲科選任其地蓋誠重之矣

見任知縣王從正操守才具亦稱明慎  
但出自貢途望難服衆錢糧任豪強之  
拖欠而莫敢誰何追呼多奸俠之把持  
而力難究詰盖心欲爲而人玩其資格  
始雖奮而勢阻於鮮終及今不爲議處  
將來掣肘日甚縣不可幾而治矣若本  
官者亦當更置別地以免速仕者也臣  
謹爲貳地擇人查得莒州知州楊位老

成持重之器精明果斷之才德性堅忍  
於困衡力量克堪乎盤錯若以調補膠  
州自可竟其宏施城武縣知縣張居仁  
剛方有執廉介無私念惟切於窮民法  
獨伸于豪右最爾小邑未盡其才若以  
調補萊陽方可展其驥足但二官俱以  
甲科遷謫在楊位則僉惜其非辜張居  
仁亦多憐其沉抑今仍調任必再更歷



歲時似應稍加旌勸勉令殫心任事果  
有成績容臣特疏薦揚不次超擢以示  
優異庶不傳舍於新任益用風勵於將  
來其萊陽縣知縣王從正即可調補城  
武惟膠州知州羅啓先未可更調莒州  
蓋莒州視膠州爲差易而視他地爲猶  
難臣又爲莒州擇人查得兗州府通判  
王狹吉才華敏練意念真誠署篆所至

著聲詰戎隨施底績節經薦獎俸幾三  
年堪以陞補莒州知州若以俸序未深  
不妨通筭久任臣詢質僉同相應題

請合候

勅下吏部再加查訪如果臣言不謬將莒州  
知州楊位調補膠州卽以兗州府通判  
王狹吉陞補莒州仍令久任城武知縣  
張居仁與萊陽知縣王從正互相更調

膠州知州羅啓先另補簡僻州缺楊位  
張居仁優加旌待俟有成績特薦超遷  
庶人與地相宜民生吏治均有裨益矣  
臣猶有說焉夫地以人爲汙隆亦以時  
爲緩急時急則擇人尤急焉萊登僻在  
海隅在無事時多鄙夷之舉貢十居八  
九至有闔郡州縣無一甲科者此何時  
也倭患戒嚴時荒告困非昔比矣遴材

任使安得不加之意乎毋論正官需人  
卽城池之修舉兵器之除置荒蕪之開  
闢盜賊之擒芟勢必委之佐貳如先年  
倭至寧海有以一判成功者所係亦爲  
非輕似宜一體遴補合無容臣將沿海  
要緊州縣正官員缺報部以甲科及舉  
人材能者除授其在本省屬官果有異  
等者不拘資俸酌量題

請陞調其佐貳官負有奇能邊海可資任使  
者不時咨部議補則海邦多得人之效  
卽倭警不足虞矣并乞

勅部覆允施行謹題請

旨

議州佐改攝縣事疏

題臣惟安民必先其至急用人在拔其素  
優故久敝之巖邑非擇人而使何以慰

望治之人心而試可之下僚必破格以處乃能振思奮之吏治山東荒稷之餘閭閻多敝其在濟南則新泰縣其甚者也縣誠褊小而土瘠人稀差繁賦重民間困苦迥與濟屬諸邑不同向來縣官不得其人因循玩愒吏緣爲姦民不堪命加之去歲被災獨重益致凋瘵老弱轉徙井里蕭條臣重憂之故因正官之

缺行委賢能之吏往署縣事而得德州  
同知李上林者其人足任也上林雖出  
監途而著名禮經雅通世務其才妥練  
其守端潔曾署本州印務得民過於真  
守署平原縣印人甚德之群赴臣願借  
爲令近署新泰拯救災萌實心幹濟申  
罷一切加耗之徵與里甲繁冗之派夙  
蠹盡湔民大歡戴據司道府官開報皆

謂本官儘堪民牧卽今新選知縣尚未  
到任若以上林改攝縣事將來必更有  
可觀者臣查訪相同切惟新泰重困之  
民皇皇望賢令渴如望歲卽新令誠賢  
而貢生初任一時民隱恐未周知奄奄  
瘡痍之子黎豈容嘗試萬一未堪民將  
何怙誠不若以歷試之上林就近遷改  
之爲便也查得先年費縣疲敝撫按官



題將東平州同知楊果攝管縣事果能  
其官費遂大治至今倉有餘粟救荒賴  
之夫果一掾吏也破格用之輒效如此  
臣每欲廉得如果者以濟疲邑之急而  
未確見其人不敢輕舉如上林者所至  
稱賢公評僉允故敢以

請伏乞

勅下吏部查議覆

請將德州同知李上林仍以原職管新泰縣  
事令其招撫流移開墾荒蕪禁弭盜賊  
安輯疲民用心料理果績用有成容臣  
一體薦揚查照往例

奏陞府佐以示優異倘或志節不堅付託  
不效聽臣拏問斥逐如例其新選知縣  
于永亨另行改補庶疲邑漸可以振舉  
而卑官爭知所奮勵矣謹題請

設青州守備疏

題臣據山東布政使司呈蒙臣批據青州  
兵巡道呈稱道屬青州地方遼闊民情  
强悍盜賊易生且南自安東北抵塘頭  
一帶濱海要害以故設有馬步兵快千  
餘防禦向無專官訓率每以本衛武官  
充委多不得人或以罷閒將官領攝亦

屬未便今海防多事乞照萊登事例專  
設守備管領居常督率訓練有警統領  
禦敵事體便益等因蒙批仰布政司會  
同按都二司覆議詳報依蒙行准清軍  
驛傳鹽法帶管青州道副使詹思虞牒  
據青州府呈稱青州兵快千餘頗稱勇  
健向令該衛指揮管領以土官任事不  
無顧忌之念因循玩愒無裨實用委官

攝管體統又多未妥相應專設守備統領其本官廩餼心紅公署牢伴等類照萊登濱德事例處給緣由到道覆議相同等因到司該本司右布政使程正誼會同按察司按察使陳文衡都司署都指揮僉事李繼春看得青州之地依海阻山民稠地廣風俗强悍盜賊易生舊設快壯千餘在府城團操以資彈壓誠

保守至計但無主將統領督率委之該  
衛指揮號令不行兵無紀律每歲徒糜  
糧餉難責其衝鋒破敵該道議設守備  
管領誠于地方有裨其衙宇廩糧等項  
聽道府照例處備伏候裁奪會

題等因呈詳到臣該臣會同按臣議照青  
州古齊之都境俗多剽悍奸宄易滋安  
東塘頭等處濱連大海在在要害以故

防禦彈壓視他道爲難而團設兵快亦  
視他道爲多蓋誠重之矣但向來以千  
餘勇悍不易馴之卒伍委之本衛一二  
不盡才之武官望輕情暱稍嚴則嫌怨  
易生一玩而因循不振間或攝以廢閒  
將領體統靡定又多齟齬卽平時約束  
未能倘有事緩急安賴且今萊登等處  
兵戎俱有將官統領而獨青州要地有

墾荒蕪以佐軍資去歲周巡海上目擊  
前項島田原皆沃土祇緣歲久因循遂  
爾委之蒿萊殊爲可惜臣因而條議開  
墾該部覆稱可行荷蒙

皇上俞允臣隨行該道督率官軍如法開闢  
卽今四月以來開墾二萬二百餘畝禾  
苗日漸播種中多可望有秋據事課功  
似有成緒且其餘三島更寬將來盡數



耕種獲當十倍誠海上之一大利也但  
前地荒蕪年久越在海濱人多畏憚所  
幸各官鼓勇趣事殫力經營冒涉波濤  
殫宿風露辛苦萬狀較之腹裏效勞不  
啻倍蓰前議初始自臣督責自臣若不  
特

請激勸非惟孤各官任事之心抑恐始勤終  
怠隳棄前功不無可惜除分理効勞各

官臣徑行獎勵外所有賢勞趨事文武  
官員如原任廣東瓊崖叅將邵曾和沉  
毅有謀真誠任事投荒島而櫛沐風濤  
督諸軍而胼胝手足登州衛指揮使樂  
維城志切奉公才優幹濟正經界不牽  
群議課耕作克殫一心以上二官勤勞  
稱最相應紀錄其調度督率則海防兵  
巡道副使趙壽祖長才偉識石畫冰心

勸相多方三軍懷挾纘之惠劑調中綮  
百年垂永利之圖備倭副總兵楊文壽  
略淵涵剴裁機決指揮士卒闢萬畝於  
荒藊嘯傲鯨鯢狎層波於衽席以上二  
官望隆文武一節未盡其長而事藉助  
勲成功實多其力所當均爲敘錄者也  
伏乞

勅下該部再加查覈如果臣言不謬將副使

趙壽祖副總兵楊文原任叅將邵曾和  
指揮使欒維城移咨吏兵二部紀錄優  
敘以後果能盡力開墾島無曠土軍有  
餘糧另行顯擢如或罔終怠事仍行議  
處庶激勸明而人心知奮開闢廣而績  
効有終矣謹題請

旨

由庚堂集卷之二十六終

由庚堂集卷之二十七

縉雲鄭汝璧邦章



奏疏

恭謝 天恩疏

奏臣原任南京太常寺少卿於萬曆三十一年正月初五日准吏部咨爲缺官事該本部等衙門會題奉

聖旨鄭汝璧陞都察院右僉都御史巡撫延

綏等處地方贊理軍務寫勅與他欽此備  
咨到臣隨卽望

闕叩頭謝

恩剋期就道赴任於本年三月初十日據榆  
林兵備道呈送臣衙門原用關防

符驗旗牌并吏卷等項到臣卽日收管任事  
訖切念臣蓬茅下質線襪微材中外歷  
官踰三十年曾無善狀前後出塞且數

千里寧有奇勛起家周南幸安奉常之  
清暇鳴劒伊北敢望疆場以勛勦不意  
濫與

廷推誤蒙

特簡授以節鉞之寄擢之風紀之司蹟而復  
趨

恩有加於三仕慙而兼懼報奚取於一長聞  
命冰兢循躬蚊負臣惟延綏一鎮先居上郡



今徙窮邊環卜莊愛諸部之驕虜扼中  
東西三路之衝區邇來戰士疲於調征  
兼之夷情疑而反覆垂處置而起戎心  
則釁連於宣大踈戰守而隳敵愾則威  
損於甘寧臣昔任中路一障已睹其難  
今領全鎮多方其何以稱臣敢不畢力  
馳驅殫精籌畫奉

廟堂之定見定議聯邊臣以真心同心撫

舊治之軍民樹之恩信馭復款之部落  
與以弛張馴伏則示羈縻不先漢過眺  
梁則申撻伐有赫

明威兼蒐異材於將藪以備四方緩急之需  
永固鎖鑰於長城以抒

九重宵旰之顧此臣誓竭犬馬之微衷而仰  
荅

乾坤之大造者也臣不勝感激屏營之至謹

具奏

謝以

聞

薦將材以備擢用疏

題 臣查萬曆十五年六月內准兵部咨  
該本部題各邊缺多人少合咨督撫衙  
門各將所屬衛所等官加意諏訪年力  
精強才猷諳練謀勇兼長緩急可恃者

卽於年終酌量奏薦逐名註考要見某  
某宜於衝邊某某宜於次衝某某堪任  
大將某某堪任偏裨另爲一疏惟其人  
無拘名數貴乎精弗當冒濫等因題奉  
聖旨是各衛所武官材勇堪任的着督撫等  
官博訪精覈從公奏薦與武舉相兼備用  
不許冒濫欽此臣查得萬曆三十年已終  
備將堪任將材官員逐一博諏精覈臣

會同營臣訪得右營中軍榆林衛右所  
百戶武貴雄軀虎視壯志鯨吞賈勇屢  
摧當戶之鋒運籌可備登壇之選常樂  
堡操守西寧衛千戶薛來胤膂力辟易  
千夫籌策沉酣三略已著征西之績應  
收逐北之功神木營中軍榆林衛鎮羌  
所百戶高鸞勇略冠軍威名懾虜角技  
直當上駟囊智允稱中權左營中軍綏

德衛指揮僉事劉賀政一段逼人猛氣  
四顧馭衆長才智著談兵名高拔幟波  
羅堡坐堡綏德衛右所百戶周從善射  
可落鵬力能扛鼎精悍敢當大敵慷慨  
欲請長纓榆林衛鎮羌所掌印副千戶  
張斌善讀父書精研將略料敵明同觀  
火應機捷若轉圜靖邊所掌印榆林衛  
左所百戶袁廉才華電掣膽氣驍騰拳

旗樹績於前茅，握符揚聲於西路。榆林衛副千戶高愈，謙器宇端凝，若峙精神，矯健欲飛，偉然枕戈之志，恢乎游刃之才。綏德衛掌印指揮僉事劉熊，鎮重不浮，廉明有幹，掌篆守絕苞苴，撫卒恩孚。醪績清平營中軍榆林衛武舉鎮撫李時陽，熟嫻騎射，敦悅詩書，入彀有國士之風，折衝堪師貞之寄。嚮水堡操守遼

海衛副千戶劉俸心同執玉才若鍊金  
勤振剔而堡務一清範馳驅而武功疊  
奏鎮靖營中軍綏德衛實授百戶李釗  
清揚有識警敏多能散金得猛士之心  
厲兵壯全營之愾正兵營中軍綏德衛  
指揮僉事王世煥禮貌魁偉膽略沉雄  
練達有裨傳宣勇敢足資馳驟以上各  
官品質雖有不同材勇均堪器使所當



薦揚以備推用內武貴薛來胤高鸞劉  
賀政周從善張斌袁廉高愈謙宜於衝  
邊劉熊李時陽劉倬李釗王世煥則宜  
於次衝者也臣等惟榆林素稱將藪生  
材甲於諸邊前此舉者頗多而臣等今  
薦止於此數卽廢閒將官前此舉者悉  
錄而臣等今薦未及此儔緣臣抵鎮甫  
及兩月誠恐一時耳目未周名實易混

故嚴加酌覈祇以所知者據實

上聞而以所遺者尚需後舉蓋期於掄材之  
中敬寓慎重之意而已伏乞

勅下兵部再加查訪如果臣等所舉不謬將  
武貴等酌量以次擢用庶折禦有人而  
安攘有賴矣謹題請

旨

調補邊邑正官疏

題臣據榆林道叅議劉餘澤呈稱清澗縣知縣胡安吉丁憂回籍本縣地逼紫塞民近黃河吏善作姦人多逋賦最稱刁疲向來無一官遷去者亟宜得人整頓若需之銓選誠恐日久未至吏治益淪非所爲揀時計也呈乞將近屬隣邑遴選賢能官員調補等因通詳到臣該臣會同督臣議照縣令寄命百里得人爲

重而得人於邊方巖險之邑則尤重邊  
方振作固難而振作於積廢極壞之後  
則尤難蓋始也因不得人而致敝旣也  
因敝極而愈難得人人與地交敝而民  
生吏治將奚賴焉若今之清澗縣是已  
清澗介在延鎮邊鄙地瘠而衝民窮而  
悍邊餉多有積逋防秋歲有重寄非才  
識兼優寬嚴互用者常以吐茹而僨事

歷查該縣正官多無以善去者則由於  
官之不得人而積敝之未易挽也及今  
不爲掄才整理將來益不知其所終矣  
邊邑保障安危所係安得不亟爲之圖  
也近者知縣胡安吉履任未幾卽以憂  
歸若待照常銓除旣未徵其才力卽就  
他途陞轉又莫必其能勝委應就近遴  
擇已試相應官員調充其任以濟目前

之急查得延安府延川縣知縣陳王道  
英標敏識潔守長才釐蠹百務改觀厲  
精諸艱堪試以任延川三里之城未盡  
其用移之清澗衝疲之地庶展其才旣  
經該道具呈前來相應題

請伏乞

勅下吏部再加查議上

請將延川縣知縣陳王道就近改調清澗縣

勒限到任所遺員缺另行銓補或前缺  
除有新官卽改任延川庶巖邑得人涸  
瘠可起而邊計民生胥有利賴矣謹題  
請

旨

由庚堂集卷之二十七終

由庚堂集卷之二十八

縉雲鄭汝璧邦章甫著

奏疏

乘款加脩戰備疏

題臣本一介南國書生不嫻軍旅誤蒙

皇上任使畀以衝邊重寄日惴惴焉弗克肩  
荷是懼惟是戰款機宜奉有

廟謨督臣詳加經略前撫臣力爲綢繆臣遵



循申飭奚事多言顧十年罷款之虜一朝尋盟羈縻自今日始全鎮敢戰之兵一朝息戰脩備振玩亦自今日始臣直爲此廩廩與攄一得少效邊籌謹會同督臣議照延綏一鎮邊長一千二百餘里套虜諸部環而居之今所與定款者撫賞帀物總之三萬八千金耳以三萬八千金而羈縻一千二百餘里之虜令

其馴服安帖省審兵征調之費脫居民  
蹂掠之苦詎非便計哉第夷欲無厭少  
徇卽大肆要求不可底止拂之遂棄前  
惠而生他端故必持我經制尊我

國體然後彼知畏戢而不敢越志焉然而  
不可恃也套虜地醜力齊遁相爲雄漫  
無統一卜失兔係套長而不能自長莊  
明諸部桀驁跳梁甲伏乙起一事攜則

不成款一部貳則不成款矧其未忘明  
安之忿尚懷西助之謀犬羊叵測能終  
保其不渝乎故臣等於夷使之來開布  
誠信旣示之款以釋其疑心復示之經  
制無增以杜其妄乞一面整兵待戰脩  
備固防又示之不必款以挫其狂謀百  
折五申虜皆唯唯蓋自去冬卜莊諸酋  
齊赴市口稽首領賞互市恭謹無譁萬

目共覩賞物一照題

准額數毫無加增錢糧冊籍具在則亦旣成款矣又刻定賞單合同照給歲以爲常未赴市不遣人傳調已赴市不遣人齎送則亦旣成體統矣每歲委三萬餘金予之市而款事畢矣臣等今所亟亟者戰備耳延鎮人多忠勇敢戰旣款恐其怠也則宜加意鼓舞以作其銳氣然地

苦不毛軍多疲瘵又重念其困也則宜  
極力撫摩以復其元氣凡除戎器繕城  
堡脩墩臺明號令釐將校之朘削減夷  
馬之貲累酌本折之便宜禁站遞之騷  
擾一切振武恤軍之事可徑行者臣等  
與鎮道分司及將領各官日加脩舉俱  
不敢

瀆陳惟有事關兵將應具

題者列款以

聞伏乞

勅下兵部查酌如果可採覆議上

請行臣等遵奉施行邊陲幸甚臣等幸甚謹

題請

旨

一定營制以便訓練臣等惟治軍必分數  
明而後部伍肅肅以制也延綏鎮城正

兵左右標各營軍馬自萬曆元年題定  
營各三千計一萬二千人今節年凋耗  
僅存三分之二矣而又參差不齊如正  
兵營數過三千左右營不足二千標兵  
不及一千增減惟人多寡靡定影冒從  
生且有警之日左右營例在東西二路  
防禦僅領六七百名以往餘皆畱附正  
兵營調用兩遊擊率領孤軍何以禦敵

是并其營而空之觀望推諉非軍之善  
經也臣等惟軍餉有限固不能加多於  
今額之外軍制有數猶可整齊於今額  
之中遂會行鎮道逐一酌議裒益定以  
正兵營三千名左右營各足二千名標  
兵一千名多者裁之不足者補之軍爲  
一單書疤記年貌以防替倩書所習兵  
器以備掣較馬書年齒毛色以便臚驗



每營印訂裝成冊籍有事隨時更換臣等置之案頭不時掣閱軍之強弱馬之壯瘦與器械之精銳不待臨教場而莫之遜又爲餉單月各一幅某營某月支餉若干逃亡倒變扣銀若干亦訂而籍之軍馬數與餉數不必閱倉庾而莫之遁遇有警息左右二營各盡數領防責之戰禦自不得以兵少爲解大將統率

正兵等營亦自足當一陣各軍有事故  
卽除有缺卽補凡入籍者皆爲戰兵常  
川操練不得別占差用數旣截齊易於  
稽閱軍專備戰易於振作總兵官詳其  
目臣等綜其綱鼓舞勸懲銳氣自倍雖  
不能如昔年之加多亦不至如今日之  
殘缺營制一齊而戰守有賴矣伏乞

聖裁

一練步卒以濟實用臣等惟古今將兵兼

用步騎衝鋒追逐利於騎安營堵防利

於步故兩敵相持馬兵且就步安營若

步兵立定挑壕堅壁虜不敢衝功與馬

軍等蓋有一卒卽有一卒之用未可虛

糜官餼爲也延鎮各營俱有步卒多驍

健可使乃向來隨營帶操平居飽食臨

警株守多不出城赴敵以故冒克私役

漫無稽查卽有時簡汰仍在本營名革  
實存竟循故套夫以可用之卒費無窮  
之餉而使之坐食不幾於濫乎臣已會  
行鎮道查議僉稱步兵可用除將雜役  
必不可已者嚴加稽覈酌量畱用另入  
雜隊外其餘查出立作步兵一營標下  
裁發一百五十名正兵營五百五十七  
名左右標營七百一十六名道衛各衙

門八十一名共一千五百四名先行編成隊伍以後旬補無馬軍丁陸續增入一照馬軍立單以原任遊擊李崇榮操練多習火器專一聽調如有警息或先期預發防守或臨期隨營堵禦或設奇劫營搗殺相機分遣不得占畱一人見今練成一軍氣似奮迅足資防禦顧須專官常川統領方便責成查得李崇榮

才守兼優恩威竝濟各軍已率其教且服其廉防秋脩市效有勤勞近該臣等會薦將材合無卽起充遊擊專一訓練有功重加敘錄如或怠玩悞事卽行叅革另選庶營無虛兵人有實用亦折禦之一助也伏乞

聖裁

一專將任以便責成臣等惟撫與戰兩事

也人心無二用左畫方而右畫圓卽兼才難于措手況軍務夷情尤其難者乎查得萬曆二十年該前撫臣賈仁元題准將原畱入衛後營兵馬歸併巡撫標下遊擊統練至二十七年調標兵征播起原任遊擊李經授以標營遊擊統領前往是借銜西征非實設有標營也二十九年套虜講款前撫臣孫維城題將波羅

叅將馬應時調赴鎮城講折維時虜款未就適征播標兵回鎮遂令馬應時攝領以示有所事事其實本官以撫夷用非以標營用也今款定矣夷使往來迨無虛日卽專心撫處尚費精力而可兼操練之事乎欲赴教場則悞市場欲理款事則悞軍事且標下原兵不歸標下而更立標營名色復令他將兼管與原



題事體未見歸一所當酌議者也據叅將馬應時陳其難兼願辭治軍專管撫夷臣據呈卽行該道議稱撫夷官止應撫夷標兵宜仍歸標下將官統練官有專理事易責成臣等細加查酌委爲妥便合將標營名色裁去其見在兵馬一千名照舊歸併標下將官管領一視各營操練有警聽臣等調發或隨大將或

合路營隨地剿殺馬應時卽以鎮城撫  
夷叅將令其專管夷務勤勞果深酌議  
加銜仍量給家丁一百名馬五十匹以  
便市場差用應領

勅書照今議開坐奉行庶職守不至參差隨  
事可責實效矣伏乞

聖裁

一酌信地以重駐防臣等惟邊陲設將視

其地地重則將居重以扼險設兵視其將將在則兵加多以備援卽時有變通而事貴長便延綏中路設叅將一員駐劄保寧管波羅嚮水魚河歸德鎮川雙山常樂八堡萬曆二十七年因虜患孔亟添設波羅叅將一員分管懷遠波羅二堡以叅將馬應時居之繼因馬應時調赴鎮城撫夷遂裁波羅將官改設守

備其保寧叅將兵止五百名不足應援  
復題令城守盖一時權宜之畫也顧細  
計之波羅大川河口極衝虜犯鄜延必  
由此入故特設一將官誠重之也而以  
馬應時之調赴鎮城而裁則非初設意  
矣保寧叅將職在應援乃兵止五百名  
而專防本堡則非設將意矣就二地論  
保寧離鎮城三十里卽有虜警鎮兵呼

吸可至波羅則遠當虜衝視保寧緩急  
不同矣就二地兵馬論則波羅守備有  
軍一千二百餘名反倍於保寧叅將之  
兵多寡抑又不倫矣竊謂未妥隨行鎮  
道將官悉心詳議僉稱波羅地衝不可  
無將官保寧近鎮城止須一守備合將  
保寧叅將與波羅守備更移駐防臣等  
覆加叅酌以保寧叅將移駐波羅兵不

必添而扼險應援俱爲有濟以波羅守  
備移駐保寧零虜自可拒守大舉鎮兵  
卽至事亦無虞一轉移而兩地俱安委  
爲長便但保寧叅將所轄雙山一堡在  
鎮城之東地勢懸隔應援爲難又鎮城  
邊墩無多既有守備可以提調而復屬  
之保寧叅將以外制內以遠攝近事體  
亦爲非宜及查保寧叅將所轄八堡高

家堡叅將止管三堡雙山去波羅二百  
一十里去高家堡八十里若割雙山屬  
高家堡叅將管轄各給領

勅書遵照行事應援旣便多寡亦均其鎮城  
邊墩止屬守備提調免以叅將遙制事  
體尤妥臣等酌計久遠衆議僉同故不  
敢以更置爲煩也伏乞

聖裁

一徵馬價以壯騎操臣等惟逐虜馳突全資馬力延綏軍多勇健而馬難于壯故舊制延慶二府抽選本鎮土兵四千七百八十餘名每名免糧二十石以下不等共六萬二千七百餘石專備買馬倒死卽買臆壯者以充軍不困而雲錦成隊戰陣多得力焉近年始改議徵價每石徵銀三錢三分取數無多卽使徵解盡完



尚不足以充乃額銀二萬六百餘兩完  
不及半計近年拖欠凡十有三萬餘兩  
屢催不完細查其故地畝納銀不任他  
役輕於民間他畝以故多市之豪勢之  
家展轉詭計官不能清邊鎮寫遠令不  
能行雖有叅罰

明例亦每因循玩愒馬死多累本軍賠償荒  
徼貧軍鬻妻子不足以應官憐其苦卽

瘦小者亦姑爲收驗倒死愈多賠償愈  
苦缺額愈甚則互相容隱以免責罰而  
馬數日少且不堪騎欲如昔之臙壯不  
可得矣識者謂宜仍復

舊例但已經題

准遽難倏更顧其初以民之苦于軍需也而  
改議以惠民今乃地入豪強之手而虧  
價以病軍民不受惠軍復受累邊疆重

務可任其凌夷至此乎今欲責之完納  
須先清其經制合委風力府佐官二員  
分往延慶二府土兵免糧州縣將地畝  
逐一查勘要見某地見在某地別賣見  
在某人承管節年馬價何以不納官何  
不催具冊開報按冊查徵則人不得影  
射官易追輸以後每年必完額數如有  
不足分數者照例查叅卽官已離任亦

行追論如例其銀徵完專備三路買馬  
支用度馳驅有藉而軍困亦蘇矣伏乞  
聖裁

議薦將材疏

題 臣先准兵部咨該本部題奉

聖旨是各衛所武官材勇堪任的着督撫等  
官博訪精覈從公奏薦與武舉相兼備用  
不許冒濫欽此今照萬曆三十一年已終

例應薦舉臣汝璧是歲春杪抵鎮時套  
虜卜莊等酋特點持疑未就款而逮秋  
高馬肥始臨邊講賞聚族擐甲牽綴往  
事要挾百端先該督臣節行本鎮厚集  
兵防堅守經制臣會同總兵官居中調  
度督令各將畫地分防復擇委原任將  
官智勇兼優呼吸有濟者分領精兵按  
伏策應虜知有備不敢越志卽杪忽兒

等桀部啗喝生事臣斥之去耀武示威  
諸酋噤口讐心入我臯牢遂畢市事迄  
今安靜則原任諸將與有勞焉夫榆林  
將數也人多忠勇可使臣身任疆場之  
寄制虜安邊遴才是急無其人與非其  
人臣不敢私有其人并有其勞臣不敢  
蔽該臣會同督臣訪覈本鎮武弁才勇  
足備緩急堪以薦用者在衛所營路得

十有三人焉在原任將官得五人焉謹  
列名爲

皇上陳之如榆林衛所鎮撫王琚斤斤不失  
尺寸英英自邁尋常好謀能敦說乎詩  
書敬事可周旋於鞭弭鎮羌所試百戶  
高鸞劔鋌躍冶囊智轉圜勇敢稱介冑  
之雄敏練徵盤錯之利綏德衛指揮僉  
事孫承祖正氣耻事脂韋潛心精研韜

略可奮前茅且覘大樹綏德衛試百戶  
馮淮年強而機宜洞朗志銳而技秣優  
長力裕騫旗謀堪佐箸正兵營千總遼  
東瀋陽衛百戶曹養名棄繻英年請纓  
壯志賈勇直足冠軍脩名共推傑士榆  
林衛武舉鎮撫李曉儀容脩挺騎射精  
優豹略已脫穎於青錢龍標宜蜚英於  
紫塞靖邊營中軍慶陽衛武舉鎮撫李



如蘭英風慷慨壯略恢宏力能挽強而  
用長志在枕戈而裹革綏德衛試百戶  
樊繼先驍雄膽氣駿發才華橫槩綽可  
衝鋒持籌儘能料敵榆林衛百戶李承  
勲虬髯偉貌虎視雄心提兵曾馘臙腥  
守障能堅壁壘寧塞營中軍榆林衛試  
百戶牛承業穿楊擅巧超距推雄馭士  
恩能濟威詰戎守不忘戰榆林衛試百

戶許世臣心同執玉才若發硎勤勞有  
裨於籌邊果毅無難於振旅原任守備  
延安衛試百戶張二曾懸斗膽人號鐵  
英揮戈所向無前蹈刃雖艱不避原任  
守備榆林衛百戶韋世江幹才縝練器  
識老成任事能理劇解紛臨戎堪折衝  
禦侮以上各官在王琚高鸞孫承祖馮  
淮曹養名李曉李如蘭張二俱宜衝邊

樊繼先李承勲牛承業許世臣韋世江  
俱宜次衝雖據一時之見聞大將偏裨  
有難預擬然才勇俱堪委任相應酌量  
推用以示器使者也原任延綏總兵官  
王威赤膽白衣沉機卓識勇略萬夫稱  
特雄名九塞推先久待賜環急宜推轂  
原任定邊副總兵杜松骭髀骨體結士  
家無贏金激烈丹心酬恩身有長劒半

生勛勞獨茂一時名將鮮儔原任入衛  
遊擊李崇榮赳赳出羣之貌恢恢馭衆  
之才談吐滿腹皆兵戰陣渾身是膽原  
任入衛叅將郭有中胷富韜鈴身輕金  
革摧鋒常當勍敵決機屢效前籌原任  
安邊管叅將事都司僉書杜文煥挺挺  
英豪之氣斷斷詩禮之風署營務而廉  
得士心佐秋防而威奪虜魄以上各官

才略可備緩急秋防各效勤勞在王威  
見在查勘應候勘明酌用杜松原以告  
病奉

旨聽用遇缺卽應推補李崇榮郭有中省奮  
已久杜文煥告病今痊均應及時推用  
以盡其才者也伏乞

勅下兵部再加查訪如果臣等所薦不謬將  
衛所營路等官量材擢授原任各將隨

缺起補庶才勞競奮而安攘有資矣謹  
題請

旨  
薦舉監司疏

題臣查得舊例兵備等官每歲秋畢年終  
該軍門會同各撫臣甄別具

題萬曆三十一年秋畢歲終所據在事各  
官俱應照例錄敘等因會稿到臣該臣

會查得靖邊兵備道右叅政劉任孤騫  
直攄真性卓犖獨抱苦心恤貧伍而惠  
澤春融肅憲度而鑑衡秋湛分守河西  
道副使田立家赴義勇如破的摧姦捷  
若發蒙借箸動中機宜投膠歡騰旬服  
榆林兵備道右叅議劉餘澤經文緯武  
之材立方轉圓之器運張弛而旃裘煩  
首鬯德威而將校傾心以上三臣悉於

兵防有賴俱應薦揚以備擢用者也又  
查得陝西布政司左布政使王民順率  
屬高冰玉之標籌邊諳風雲之變時轉  
輸馬騰士飽嚴稽覈弊絕風清帶管督  
糧道右布政使王一乾才可水斷陸剽  
政如車輕路熟吏奉法而飛輓恐後師  
宿飽而庚癸無譁此二臣者雖無兵防  
之責在王民順總理錢穀四鎮之供億



悉賴經營在王一乾職督稅糧三邊之  
兵儲全歸徵發統應併薦者也伏乞

勅下吏部再加查覈如果臣等所舉不謬將  
劉任等王民順等紀錄擢用庶激勸旣  
明而臣工益勵矣謹題請

旨

由庚堂集卷之二十八終